



Шочмо эл, порылык да чын верч!

Б У Д Ъ Г О Т О В /

9-ше (3760) №,
2026 ий 6 март,
кугарня



0+

Мде лий

1933 ий 1 февраль годсек лектеш.

«Ўдырамаш – тўвыран да сымыктышын шепкаже»

8 Март – Ўдырамаш-влакын
тўнъямбал кечышт.

Профессор Галина Шкалинан ой-савыртышыже тыге йонга. Чынак, тўнъяште чылалан тўнгалтышым ава, ўдырамаш, пуа. Изи ньогалан илышым пўлекла. Йўратен да шыматен йол ўмбаке шогалта, калыкше, йылмыж дене палдара. Ўдырамашын кидыштыже – волгыдо ончыкылыклан ўшан. Садлан икшывыже-влакым изишт годымак чын корно дене ошкылаш, поро, шке калыкым йўратыше да аклыше лияш туныкта.

Звенигово район Кужмарий селаште илыше Татьяна Витальевна Васильева йочам чын ончен куштымын кўлешлыкшым раш умыла.

– Изиракым чаманен, кугуракым пагален илыман. Ача-авам аклыман. Нуно пеленна улыт гын, ме эн пиалан лийына. Тидым икшывыннан койшышыкыже шке примерна гоч шында-раш тыршена. Садлан пелашем дене шке ача-авана деке чўчкыдын уналыкеш коштына, кўлеш годым полшена, – оила Татьяна.

Умбакаже –

4-ше лаштыкыште.

Фотом еш архив гыч налме.



Татьяна Витальевна – икшывыже-влак дене пырля.



Моркышто –
«Кугезе вож»,
Пўкшермыште –
«Йоча Ўярня».

3-шо лаштык



«Ўдыр кочкаш шолтен, ур-ген, тўрлен моштымаш», –
ойлат Звенигово район
Кужмарий села гыч
Васильевмыт. 4-ше лаштык



«Мику коча
«накаркал»,
а Оля полыш кидым
шуялтен».

6-шо лаштык



Российысе увер

«Связующая нить народов России» II всероссийский конкурс 1 июль гыч тўналтышым налеш. Кум тўрлө танас почеш пашам ямдылыман. Кумданрак связующаянить.рф сайтыште лудса.

Мурылан мутым возышо ўдыр-рвезе-влак шке пашашт дене «Знание.Авторы» Н.Н.Добронравов лўмеш общероссийский муро поэзий конкурсыш ушнен кертыт. Йодмашым znanierussia.ru сайтыште 31 март марте колтыман.

«Защитники Отечества» фонд «Памяти героев верны!» IV всероссийский усталык конкурсым увертарен. Кумылан кажне ег ушнен кертеш. Тўрыс увер – памятигероевверны.рф сайтыште.

Марий Элысе увер

Звенигово район Какшамарий школ «Чомга – птица 2026 года» республикысе усталык паша конкурсыш ушнаш ўжеш. Йодмашым 31 март марте колтыман. Марий туныктыш институтын «ВКонтакте» воткылысе тўшкаштыже – тичмаш увер.

С.Г.Чавайн лўмеш Калыкле книгагудо 21 мартыште 14.00 шагатлан «Школа поэтического мастерства» вашлиймашке ўжеш. Йодмашым 19 март марте пуаш лиш. Лекше йодышым 89276813465 телефон номер дене рашемдыман.

Республикысе йоча да самырык-влаклан В.Колумб лўмеш книгагудо «Пальме лийына» дистанционный конкурсым эртара. В.Колумбын произведенийжым сылнын лудын, видеом войзыман да 3 апрель марте колтыман. Тичмаш увер – rubcolumba.ru сайтыште.



Элнетыште – «Самырык тукум»

Шочмо йылмын тўнямбал кечыже вашеш Татарстан Республикысе Микай (М.С.Герасимов) лўмеш Элнет кыдалаш школышто «Самырык тукум» регион-влак кокласе йоча фестиваль кандашымше гана эртаралтын (снимкыште). Тушто Татарстан Республик Агрыз, Менделеевск, Мензелинск районла, Одо Республик Грак район гыч йоча-влак мурымо, куштымо, почеламутым сылнын лудмо мастарлыкыштым ончыктеныт.

Фестивальын участникше-шамычым Менделеевск районысо образований управленийым вуйлатышын сомылжым жаплан шуктышо Р.Г.Назипов, нацио-

нальный образований дене методист Э.Р.Гильфанова, Монашево ялшотан илемым вуйлатыше Р.Ф.Иосифов да Менделеевск районысо «Марий-влакын калыкле тўвыра автономий» верысе мер организацийын председателыже Э.А.Савельева саламленыт. Росий калык-влакын икоян улмо идалыкым да Татарстан Республикыште Паша да сарзе чап идалыкым торжественно почыныт. Фестиваль шочмо йылмым, марий калыкын тўвыражым, йўлажым арален кодымаште кугун полшаманын иктешленыт.

Эльвира ИВАНОВА.
Авторын фотожо.

Илалше енлан польш



Тений теле лумлан поян. Эрыктен шукташат ок лий. Садлан школышто трудовой десантым увертаренна. Кажне класс кўлан гынат полша: туныктышо-ветеранлан, шонгыенлан, СВО-што улшо сарзыенгын ешыжлан. Ме, 6-шо «Б» классыште тунемше-шамыч, специальный сарзе операцийыште вуйым

пыштыше Андрей Желудкинын ачаж ден аважлан кудывече гыч лумым шупшаш полшенна (снимкыште). Нунылан, илалше ен-влаклан, тиде кугу польш лийын. Моткоч чот куаненыт да таум ойленыт.

Миша СТЕПАНОВ.
Звенигово, Чакмарий.
Фотом школ архив гыч налме.

«Кугезе вож» тукымлам уша



Калык йўлам аралыме да пойдарыме пашашке самырык тукымым кумыландымаш ик эн күлешанлан шотлалтеш. Тыгай шонымаш денак «Кугезе вож» республикысе фольклор фестиваль кумло ий наре эртаралтеш.

27 февральшыте Морко посёлкысо тўвыра полатыш Марий Элын 10 районжо ден округшо гыч 250 наре ўдыр-рвезе погынен. Нуно рефератым араленыт да йўлам, пайремым модын ончыктеныт. Йоча-шамыч шымлыме пашашт дене онгайын да тичмашын палдареныт: тошто муро-влакым муреныт, тўрлө семўзгар дене шоктеныт. Морко район Красный Стекловар гыч

Мария Курушина тукымысо муро йўла нерген каласкален. Тудын пашаже ик эн ойыртемалтшылан шотлалтын.

– *Ешнан илышыштыже музык тўн верым налеш. Кажныже мурен да иктаж семўзгар дене шоктен мошта. Мый кызит фортепиано дене шокташ тунемам, тыгак мураш йўратем. Родо-тукымем деч вараш ынем код. Нунын семынак усталыкем дене калыкым куандарынем,* – оила Мария.

Кажне выступлений изи спектакль але тошто книга гыч иланыше сўрет гай лийын. Кужэнер район Шўдымарий тўвыра пўрт пеленысе «Ритм» клуб кресава ден кресачам ыштыме

йўлам ончыктен, а Морко район Кўчыкэнер тўвыра пўрт пеленысе «Изи шўдыр» шоктышо ансамбль (снимкыште) шўвыр, тўмыр да шиялтыш йўк дене кугезына-влакын илыме жапышке ик таглан кусарен.

– *Ме уста кидмастар Петр Павлович Эчейкинын ыштыме семўзгарже дене шоктена. Тиде моткоч кузу чап. Тудын семўзгарлажым кидыш налын, тукымла кокласе кылын вийжым шижааш лиеш. Ты шижмашым арален кодымаш моткоч шергакан. Сандене тыгай сынан фестивальлашке уло кумылын ушнена,* – ойлат Артём Григорьев ден Данил Александров.

Фестивальым иктешлыме почеш, фольклор произведенийым эн сайын ончыктышо семын Курыкмарий район Микрәк йоча музыкальный школын «Шыжарвлә» күслезе-влак ансамбльже ойыртемалтын. «Сценыште ончыктымо эн сай программ» номинацийшыте Марий Турек район Карлыган тўвыра пўрт пеленысе «Зардон» одо калык фольклор ансамбль сенгышыш лектын.

Ўярня – телым ужатыше пайрем

Марий тўвыра рўдер 2015 ий гыч «Йоча Ўярня» республикысе пайремыш ўдыр-рвезе-влакым чумыра. Тений тудо Медведево районысо Пўкшерме ялын у тўвыра пўртыштыжэ эртаралтын.

Пайремышке ныл команде ушнен: Йошкар-Ола гыч «Падыраш», Морко район Волаксола школ гыч «Ўдыр кумыл», Медведево район Шойбулак школ гыч «Мелнашке-влак», Параньга район Кугу Пумарий школ гыч «Самырык тукым». Нуно кум конкурсышто усталыкыштым ончыктеныт. Пайремым «Ўярня мелна» конкурс дене почыныт. Команде-влак жюрикоманмелна, паренге мелна дене сийленит, а Волаксола гыч команде мўр ден пўчыж мелна дене брыктарен.

Могай пайрем муро деч посна? Вес конкурсышто ўдыр-рвезе-шамыч ончылно моткоч неле задаче шоген: шеледен пуымо мутым кучылтын, кўчык жапыште такмакым шонаш. Тыште Кугу Пумарий школын «Са-




мырык тукым» (снимкыште) коман-дыже ойыртемалтын.

– *Командыште кажныже мастар: икте мура, весе кушта, кумио семўзгарым шокта. Школышто перремен жапыште гармонь да тўмыр дене шоктымо мастарлыкнам эрак вияндена. «Йоча Ўярня» пайремыштат усталыкнам ончыктышна,* – ойлат тўмырзэ Ранис Хаметов ден гармоньчо Егор Мосолов.

«Ўярня кува» дене палдары-маш уремысе сценыште эртаралтын. Туштак йоча-влак тўрлө модышышто чулымлыкыштым тергенит. Пайремым иктешлен, эн чолга команде семын «Самырык тукымым» саламленит. «Йоча Ўярням» мучашлен, ўдыр-рвезе-влак, онгыш шога-лын, мурен-куштен, теле дене чеверласеныт.

Лаштыкым Катя СЕРГЕЕВА ямдылен. Авторын фотожо-влак.



Куандараш күлеш

Телым йөрәтем гынат, шошо толмылан уло чон дене йывыртенам. Вучымо 8 Март пайрем лишемеш. Ёдыр-влакым саламлаш тўналына. Авамлан шке ыштыме пөлек келша. Садлан тудым ончылгоч ямдыленам. Кок акам, изи шўжарем, кокам да пырля тунемме кум ёдырым куандараш йўным муам.

*Тимур ВАСИЛЬЕВ.
Татарстан, Агрыз, Буймо.
Снимкыште: Тимур Васильев.
Фотом еш архив гыч налме.*



Шерге ең

Авамын лўмжў паледа могай? Йўратымаш! Кажне эрдене мыланем эр кочкышым ямдыла да школышко ужата. Кастене вашлиеш, школ илыш нерген йодыштеш. Каныш кечын пўртўсышкў лектына. Авам пеледышым чот йўрата. Пакчаште тўрлым-тўрлым ончен кушта. Тудо моткоч пашаче да яндар чонан. Пайрем дене, йўратыме аваем!

*Даша ПЕТРОВА.
Морко, Коркатово.*



«Ўдырамаш – тўвыран да сымыктышын шепкаже»

*Тўналтышыҗе –
1-ше лаптыкыште.*

Татьяна ден Анатолий Васильевмытын шўртнў падыраш гай кок шочшышт уло. Полина Кужмарий школышто 7-ше «Б» классыште шинчымашым пога. Верысе сымыктыш школышто Нина Арсентьевна Филиппован вуйлатымыж почеш сўретлаш тунемеш. Кидпашалан кумылан. Фарфор, пластилин гыч ненчаш йўрата. Мультфильмым войзымаште лектышым ончыкта. Примерым ачаже, уста режиссёр Анатолий Михайлович, деч налеш.

– Полина режим почеш ила. Шуко ум пален налаш, тўрлў конкурсышко уинаш тырша. Хоббиҗе-влаклан ме кугу тўткышым ойырена, полшена, иктаж арвер күлеш гын, налын пуэна. Ёдыр кочкаш шолтен, урген, тўрлен моштышаш. Изи

йоча дене кылым мушаш. Чыла тидлан кече еда туныктем, – ойла самырык ава. – Полина шольҗым ончаш полша. Умбакыҗымат коклаштышт пенгыде кыл лийҗе, ваш эңертен, келшен илышт, шонем.

Татьяна Витальевна Кужмарий школышто да верысе йочасадыште ёдыр-рвезе-влакым мураш туныктен. Кызыт – изи Макардене декрет канышыште.

Васильевмыт ешыште (снимкыште) жапым пырля эртараш йўратат. Каныш кечын мўнгыштў огыт шинче, кинош, сийгудыш, модмо рўдерыш, пўртўс лонгаш лектын коштыт. Пайремым рўж пайремлат. Теве 8 Мартыште суртоза ёдыр-влакым эре пеледыш аршаш дене куандара, ава ден оньаважымат саламла.

*Оля МАЙКОВА.
Фотом еш архив гыч налме.*

Эн сай йолташ

Шошо. Могай сылне пагыт! 8 Март пайрем вашке шуэш. Авам, Людмила Анатольевна, (снимкыште) моткоч йўратем. Тудо мыланем эн сай йолташ. Эре пеленже лийнем. Авамым пайрем дене шокшын саламлем. Эн сайым гына тудлан тыланем. Тек шошо кече кумылжым нўлта.

*Пама УХОВ.
Йошкар-Ола,
80-ше номеран йочасад.
Фотом еш архив гыч налме.*



8 Март пайрем дене!

Поро коваем

Мыйын ковамын лүмжө – Валентина Николаевна Григорьева. Тудо Морко районсы Тошметсола ялеш шочын-кушкын. Горельский школышто тунемын. Кыдалаш шинчымашым Усурт Вараңгыж школышто налын. Вара Йошкар-Олаште ургызылан тунемын. Морко быт пörтыштö пашам ыштен. Изи Маршан ялышке кочаемлан, Вячеслав Гурьевичлан, марлан лектын. Илыш пұрымаш Энгерсола кундемысе «Рассвет» колхозыш конден. Кочам яланлыкым вуйлатен, ковам –

йочасадым. Вара воспитательлан пашам ыштен. Нуно кок икшывым ончен куштеныт. Авам Вика – «Звениговский» совхозышто ветеринар. Владик (тудо мыйын кресачам) СВОшто Шочмо элым арала. Ковам кажне кечын тудым вуча.

Ковамын ныл уныкаже уло. Ме тудым Ыдырамаш пайрем дене шокшын саламлена. Да тыге ойлена: «Ит ойгыро, ковайна! Ме тыйым чот йöратена да тый денет кугешнена!»

*Павел МАКСИМОВ.
Морко, Энгерсола.*

Саламлена

Ава кече угычын вашка, Тидым кажне ең пала. Ме, вашкен, эрден кынелына – Аванам öндал саламлена.

Авадам эн чот йöратыза, Ымыр мучко полшыза. Илышым моторым пöлеклен, Изинек мемнам ончен.

– Авай, мый тыйым йöратем, – Тыланет эре ойлем.

Лий мотор, таза да пиалан, Йывырте йомартле кечылан.

Андрей УШКОВ.

Волжский, Сотнур.

Снимкыште: Андрей – аваже Елена Леонидовна дене пырля.

Фотом еш архив гыч налме.

Чот йöратем

Таче тыйын – пайрем кече. Шокшын-шокшын саламлем. Шүм гыч лекше поро мутым Тыланет мый пöлеклем.

Тыланем, авай, пиалым, Сенымашым тыланем. Вот ужат, авай, кузе мый Тыйым пеш чот йöратем!

*София ПЕТУХОВА.
Кужэнер, Шүдымарий.*

Лач тыгай

Ава... Түняште кече гай шокшо, эр ұжара гай ныжыл, кайык муру гай йомартле. Тудын шокшыжо кажне шочшыжлан сита. Ава икшывыж верч тулыш, вұдыш пураш ямде. Ымыржө мучко чукайже верч тургыжлана. Шöртнö падырашыже черлана гын, воктечат огеш коран. Йочан сенымашыжлан, пиалжылан нигö деч чот йывырта, ойгыжым лош пайла. Лач тыгай мыйын авам. Аваем, мый тыйым йöратем! Пенгыде тазалыкым тыланен, пайрем дене саламлем.

*Юлия ЯГОДАРОВА.
Советский, Кельмаксола.*

Лий эре пеленна

Мыйын авамын лүмжө – Света. Тудо пеш пашаче. Авам черкыште пашам ыштен, а кызыт йочасадыште йоча-влакым ончен кушта. Школ гыч тунем толмеке, пöрт көргыштö арулыкым ыштена. А кастене кугу еш дене үстел йыр погынена, кас кочкышым пырля ыштена. Ава пайрем ваштареш тыгеракын ойлынем: «Шергакан аваем, мый тыйым моткоч йöратем. Тазалыкым, кужу ўмырым тыланем. Лий эре пеленна».

*Гавриил АЛЕКСАНДРОВ.
Морко, Арын.*

Чинче падыраш

Мемнан ешыште изи чинче падыраш уло. Тиде мыйын шўжарем. Тудым мый ныжылгын «Даша, Дашенька, Дашуля» манын лүмдем. Йöратыме шўжарем кок ияш веле. Мыйым «айзи» манеш. Тунамже чот куанем. Шўжарем дене коктын модаш йöратена. Леве игечыште издер дене мунчалтена, лум мөчöрым ненчена. Даша марий сем почеш кушташ йöрата. Изи шўжарем 8 Март дене шокшын саламлем.

*Павел ВАСИЛЬЕВ.
Волжский, Сотнур.*



Авам Алевтина Александровна (снимкыште) йочасадыште пашам ышта. Тудо изи йоча-влакым онча, нунылан книга лудеш. А школышто англичан йылмым туныкта. Мый авамым эн чот йöратем, пагалем. Шошо пагытын икымше пайремже дене шокшын саламлем.

*Иван КОЛЬЦОВ.
Звенигово, Поянсола.
Фотом еш архив гыч налме.*



Ушан ой

Илышын чыла моторлыкшо ўдырамашым пагален йöратымам гыч шочын!

Арсий ВОЛКОВ.



«Накаркал»

Теле. Игече палынак йўштө. Таче каныш кече, садлан шым-кандаш ияш рвезе-шамыч л у м ы м к ы ш к е н модыт. Пўжалт пытенит. Рвезе-влакын, кошш, йўмыштат шуэш, садлан модмо кокла гыч коклан-коклан лумым пурлыт.

Теве урем дене Мику коча ошкылеш. Тудын деч ялыште чыланат шекланат, юзвивиян манын кутыркалат. Мику коча рвезе-влакын модмыштым ончаш ик жаплан чарнен шогалеш. Лач тиде жапыште пошкудо рвезе, пўжалт пытыше Юрик, умшашкыже лумым чыка. Тидым ужын, Мику коча парняжым рўзалтен пелешта:

– Каслан теве черланет! Кокыраш тўналат!



Но Юрик тудын ойлымыжым колеш гынат, Мику кочан шинчашкыже онченак, ўчим ыштымыла умшашкыже лумым угыч чыкалта. А Мику коча, семынже вуйжым рўзалтен, шке пашаж дене умбакыла ошкылеш.

Кастене пўжалтын да модын ярнен пытыше Юрик мўнгыжө кокырен-кокырен толын пура.

– Мо пеш кокырет? – аваже тургыжланен йодеш.

Юрик вигак вашмутым муэш:

– Тиде Мику коча «накаркал»!

Полыш кидым шуялтен



Юра кумшо класкыште тунемеш. Урокышто туныктышын умылтарымыжым шот дене умылен окшукто, садланак «кумытан» деч кугурак отметкым налмашыже уке.

Тенгече кастенат Юра математике дене пуымо задачым мўнгыштыжө решатлен кертын огыл, садлан таче школыш эн первый толын. Амалже раш: кө деч гынат возен налаш шона.

Теве классыш ударнице Оля толын пурыш. Юра вигак тудын дече миен шогале:

– Оля, математике дене задачым ыштенат?

– Ыштенам, – ўдыр чолган вашешта.

– Мыланем возен налаш пу! – шоколад кампеткым кочкын шогышыжла, Юра йодеш.

– А тый олмешыже мом пуэт? – Оля Юран шере сийжым чоян ончалеш.

– А мо күлеш?

– Шоколад кампеткемым пу!

Юра тунамак күсенже гыч вес шоколад кампеткым луктын пуа. А Оля тудлан шке тетрадьшым шуялта. Юра тунамак, лап возын, задачын решенийжым возен налеш.

Теве математике урок тўнгале.

Туныктышо йодеш:

– Мўнгылан пуымо задачым решатлен ончыкташ кө доска дече лектеш?



Юра математике дене кеч ик «визытаным» налаш шонен, тунамак кидшым күшкө нўлталеш.

– Ну, Юра, тый таче мыйым ўрыктарет, – туныктышо Юрам шымлышыла ончалеш. – Лек тугеже доска дече.

Юра, шке тетрадьшым кидышкыже кучен, доска воктеке лектеш да возаш тўнгалеш. Серен пытарымеке, сангаж гыч пўжвўдым ўштылын, туныктышым чолган ончалеш. Тудо доскаште мом возымым ончал лектешат, Юрам мокталтыме олмеш шылтален пелешта:

– Тыгай проста задачымат решатлен от мошто! Шич! «Кокытан»!

Юра ўрын шогалеш. Нимом умылен ок керт: кузе туге «кокытан»?

Урок деч вара Юра Олям коридорышто авыра:

– Тыгай проста задачымат решатлен от мошто улмаш! Тыланет көра «кокытаным» налым! Кампеткемым мўнгеш пу, двоечнице!

Тыге-тыге...

Мўнгыштө куд ияшрак йоча ден аваже шогылтыт. Ик жап гыч аваже ўмбал вургемым чияш тўнгалеш да кўварвалне модыш машина дене толашыше изи эргыжлан ойла:

– Эргым, мый паша дене вес ялыш миен толам. Пўртылмекем, Валя кокат дече кудывечыж гыч лумым шупшааш полшааш каем. Тудлан мяш сўренам ыле. Умылышыч?

– Умылышым.

– Валя кокат мыйым ўжаш толеш гын, тыге-тыге манын каласе. Йўра?

– Йўра.

Аваже пўрт гыч лектын кая.

Изи йоча тугак кўварвалне изи машина дене модын шинча.

Ик жап гыч Валя кокаже толын пура:

– Ават уке мо?

– Уке.

– Иктаж-куш каен мо?

– Каен.

– Мый декаем лумым шупшааш полшааш мяш сўрен ыле да, – Валя кокаже нимом ышташ ўрын шогалын. – Кайымыж деч ончыч ават мыланем иктаж-мом каласаш кўштен коден огыл?

– Коден.

– Мом?

– «Тыге-тыге» манын каласаш кўштен.



Йочасадысе келшымаш

Йочасадыште Шочмо йылмын тўнямбал кечыжлан пӧлеклалтше чапле пайремым эртаренна (снимкыште). Тўрлӧ калыкын тўвыра, йўла да йылме тўняшкыже путешествий дене миенна. Йоча-влак татар, марий да руш калык модышла дене модыныт. Пайремын чонеш логалше татше кум йылме дене почеламутым

лудмаш лийын. Южыжо пошкудо калыкын мутвундыжым икымше гана колын. Ёдыр-рвезе-влак кажне калыкын ойыртемалтше тўвыраже, йўлаже, йылмыже улмым да нунын келшен илымыштым пален налыныт.

*Ирина СЕМЕНОВА.
Медведево, У Арбан йочасад.
Авторын фотожо.*

• Синквейн •

Ава
Йӧратыме, шергакан.
Шымата, мокталта, куана.
Аван кидше эн ныжыл.
Лишыл айдеме.

Максим КАЧУЕВ.



*Каця ПАВЛОВАН суретше.
Волжский, Сотнур.*

Пайрем дене!

Авам школышто историйым туныкта. Тудын пашаже шуко: уроклан ямдылалтеш, тетрадым терга, сурт коклаште сомылкам ышта. Сандене эре полшем. Кўмыж-совлам мушкам, Ваня шольмыым эскерем. Мый авамым чот йӧратем. Шущаш пайрем дене саламлем!

*София МИХАЙЛОВА.

Мыят авамым моткоч йӧратем. Тудо Октябрьский посёлкысо школышто йот йылмым туныкта. Авамын пашаже моткоч шуко. Туге гынат мый денем лияш жапым муэш. Пырляште сай, весела. Шерге енем пайрем дене саламлем. Тазалыкым тыланем. Тек эре пеленем авам лисш!

*Диана ИВАНОВА.
Морко, Коркатово.*

Пӧрткайыкым шотленам

Шукерте огыл «Воробьи на кустах» акций эртаралтын. Тудо Президентский пӧртӧс фонд полшымо дене эртарыме «Всероссийская перепись воробьев» кугу проект радамыште лийын. Тушко кокымшо гана ушненам. Марий Турек посёлкышто верланыше пӧртна воктене пӧрткайык-влак эре чонештылыт. Кормушкыш тамле кочкышым чўнгаш толыт. Но мый куд пӧрткайыкым веле войзен шуктенам. Эше узо але ава улмым палаш кўлын. Ойыр-калаш куштылго огыл.

Ме пӧрткайык-влаклан шукыж годым кугу тўткышым огына ойыро. Нунын чотышт иземаш тўналын. Ме шулдыран йолташнам эскерышаш, шотлышаш улына. Ты акцияш вескана теат ушныза!

*Полина ЦЕГОЛЕВА.
Марий Турек школ.*

• Тушто •

? Кая-кая – корныжо уке.

М.ШКЕТАН ЛҮМЕШ МАРИЙ КУҢЫЖАНЫШ ДРАМЕ ТЕАТР

14 март 16:00

3. Долгова Драме

КУБИК МЕТРИ 12+

РЕКЛАМА

ПРЕМЬЕР



0+

Марий Эл Республикасы «Марий Эл» увер агентстве» КАУ.
Директор – Е.И.КУЗНЕЦОВ.
Тўн редактор оламеш – О.В.МАЙКОВА.

Индекс П4696.
Тираж 1500 экз.
Заказ
Формат – А-4-8.

Учредитель-влак:
Марий Эл Республикасы Тўвыра, печат да калык-влакын пашашт шотышто министерстве, Марий Эл Республикасы «Марий Эл» увер агентстве» КАУ.

Редакций да издатель: Марий Эл Республикасы «Марий Эл» увер агентстве» КАУ, 424006, Йошкар-Ола, СССР Вооружённый Вийын 70-ше идалькыше урем, 20-шо пӧрт. Тел. 8(8362) 45-22-82.

Газетым редакцийште погымо да верстатлыме, «Марий Эл Республикасы Правительствын типографийже» ООО-што ямде оригинал-макет гыч савыктыме. Типографийын адресше: 424000, Йошкар-Ола, Комсомольский урем, 112.

Печатьыш пумы жап – 14-00, фактически – 13-00.

Авторын да редакцийын шонымашышт тўрлӧ лийын кертты. Серыш-влак мӧнгеш огыт колталт. Ак – кутырен келшыме почеш.


https://vk.com/yamde_lii
<https://t.me/yamdelii>
yamde_lii@mail.ru
yamdelii@mediamari.ru (автор-влаклан)
Сайтын адресше: ямделий.рф

Газетым Кыл, информационный технологий да массовый коммуникаций сферым эскерыме шотышто федеральный службын Юл кундем федеральный округысо управленийшытже регистрироватлыме. Номер – ПИ № ТУ52-01404, 2023 ий 22 сентябрьште пумы.

У конкурс



Пеледыш-влакым келшыше ўмыл дене ушыза.



Йочасадыште икшыве-влак сўретлат. Воспитательнын пашаштым ончал савырнышат, Машук деч йодеш:

- Молан сылне кенез сўреттышет йўрым ончыктенат?
- Мыйын таче кумылем шортеш, – вaшешта Маша.

Кечывал кочкыш годым ава Микунан торт пўчкышым пуа.

- Авай, а мый кок пўчкышым кочнем, – ойла Мику.
- Пеш сай, эргым. Кўзым нал да тортетым кок ужашлан пўч.

Ава паша гыч пўртылешат, Эчук деч йодеш:

- Эргым, дневникет молан лукышто кия?
- Мый тудым «кокытаным» налмыжлан шогалтенам.



Шотлыза.



Сўретым ончен, цифр-влакым ушыза да чиялтыза.

